

L'è stat n Gust che ence chest an à fat crescer de bela amicizies!

Gust 2016: jir OVER per esser averc a la endesfides

La sociazion Fassalux à metù a jir per l 7° an de seghit la scomenzadiva per fenc da 13 a 16 egn da duta Fascia. Chest an i à fat ence l Camino da Assisi a Loreto



L grop de joegn fascegn chest an te Fascia e jù per la Tèlia.



Educazion - Se à serà su ai 31 de aost l "Gust de la Lum Over" ruà a sia 7^a edizion. N Gust che ence chest an à volù ge sporjer a la comunanza de Fascia zeche da nef per i joegn anter i 13 e 16 egn.

L'è stat n meis bel e bon pien de ativitèdes, de jeghes e de gites. Te chesta cater setemènes i bec i à podù se confrontèr con sia fadies, sia desferenzenzes, sia gaissa de jir inant e de ruèr a fèr chel che i animatores ge meteà dant.

I bec à abù l met de jir a pe te la pruma setemèna "In Vetta Vedo", su per uties. I e rué sun Vael, Vaiolet, sa la Mèlga de Dò Col d'Aura e sal Zedron. I à scontrà jent che ge à contà mingol coche l'è la vita del ciaciador e i menacrepes che ge à insegnà co jir sa mont.

Te la seconda setemèna dita "Sotto sforzo sento" i bec à cognosciù i raprejentanc del Comitè Sportif Talian e i à emparà a jìer a na vida desvaliva, tolan jeghes cognosciui desche l RUGBY e mudan fora mingol la regoles. I à cognosciù l mond del sport, de la ritmica, de co fèr a troèr l giust troi con l'orientering e co fèr a portèr la roda de downhill.

Te la terza, ju te le Marche, i bec i à vivù giornèdes mingol desvalives fajan la Via Lauretana da Assisi a Loreto. Fadia, ciaut, i a vedù pajjes e posc neves, i se à mateà tel mèr, i à podù veder i dessegnes de gregn artisè desche Giotto e Cimabue a Assisi e la beleza de la "cèsa de Nazareth" a Loreto.

Te l'ultima setemèna entitolèda "Ridendo insieme vivo" i bec i à podù

se confrontèr con ativitèdes fates sul teritorie olache l bel l'era proprio chel de stèr ensema.

L'è stat n meis bel, ciaut, rich e richent de legrezza e bel de stèr.

Volon ge dir n gran devalpai a duc i genitores che ne à dat amò fiduzia, che à azetà noscia proponeta e n gran devalpai ence a don Andrea Malfatti per ne aer semper dat na man e encorajà e jir inant. N bel devalpai ence al piscop Luigi Bressan che l'è stat con i bec, l ge à insegnà co dir devalpai te desvalives lengac e l'ha benedì chesta edizion.

E un bel devalpai a Radio Studio Record che ne à dat l met de poder meter en consaputa "in real time" duta Fascia de olache eraane endèna l Camino Assisi - Loreto tras trei diretes radio olache i bec e i

animatores à podù dir zeche di posc, del temp e de coche i stajea.

No volon mia la dir fora massa grana ma... vedaron pa n auter an olache ne portarà chest Gust! Nos sion jà dò che ge pisson...

Fassalux

L pensier di bec

Diletta Pezzin da Dèlba: "Chest an l'è stat n muie bel, più che l'an passà e volesse fèr endò L Gust ence l'an che vegn. L'è stat na bela compagnia e me é troà n muie ben con duc, siane duc amisc e se aon godù e grignà. Chel che me à piàjù de più l'è stat fèr la Via Lauretana, jir a pe e vijitèr zità e pajjes. Chel che enzeve me é restà ite de chesta

esperienza de chest istà l'è che se cogn semper stèr con duc, no stèr demò con na pèrt ma stèr duc ensema".

Gregor Löwe da Ciampedel: "L'è l secondo an che tole pèrt al Gust e me à piàjù n muie. Siane 1/3 de l'an passà e ence per chest l grop l'era più leà. Aon proà n muie de emozions e aon fat bela robes. Chela che me à piàjù de più l'è stat fèr la Via Lauretana, na esperienza che dant no aee mai fat. Sion stac ence n muie fortuné e segur zachei ne à vardà via percheche sion vegnui deretorn a cèsa na di dant del teremot tel zenter de la Tèlia. Chest an é emparà che che vel dir amicizia, se didèr un co l'auter e canche un à besegn. Peisse che faré l Gust per duc i egn che podarè l fèr".

"Che bel che l'è jir al Gust" dijea zachei... sion contenc de aer podù ster ensema e endrezzer de bie dis ensema!

A n auter an!!

Devalpai a La Usc!!

su chest link l'articol con 2 o 3 foto de più!

<http://www.lausc.it/valedes-ladines/fascia/3698-n-auter-ista-de-gust-de-la-lum>

{comments on}